Maishiy iste'molchilarga elektr energiyasi yetkazib berish

namunaviy shartnomasi

Shartnoma tuzilgan sana

Shartnoma ragami-son

Shartnoma tuzilgan joy

Iste'molchining shaxsiy hisob-raqami: Iste'molchining shaxsiy hisob-raqami

"Ta'minotchining to'liq nomi va tashkiliy huquqiy shakli" Ta'minotchi korxonasi xizmat ko'rsatadigan tuman yoki shahar nomi elektr ta'minoti korxonasida Ta'minotchi korxona rahbariga ishonchnoma berilgan sanada ro'yxatdan o'tkazilgan Ta'minotchi tashkilot vakiliga shartnoma tuzish huquqini beruvchi hujjat asosida faoliyat yurituvchi rahbari Ta'minotchi tashkilot rahbarining F.I.O.si (keyingi o'rinlarda Ta'minotchi korxona deb ataladi) bir tomondan hamda ikkinchi tomondan Maishiy iste'molchi (keyingi o'rinlarda Iste'molchi deb ataladi) Iste'molchining yashash manzilida yashovchi Iste'molchining F.I.O.si bilan ushbu Shartnomani quyidagilar haqida tuzdilar:

SHARTNOMANING PREDMETI.

- 1.1. Ushbu Shartnomaga muvofiq Ta'minotchi korxona Iste'molchiga elektr energiyasini ulangan tarmoq orqali yetkazib berish va Iste'molchi iste'mol qilgan elektr energiyasi uchun o'z vaqtida haq to'lash majburiyatini oladi.
 - 1.2. Iste'molchi energiyani faqat maishiy ehtiyojlar uchun sotib oladi.
- maishiy iste'molchi elektr energiyasidan maishiy ehtiyojlar uchun foydalanuvchi aholi (uy egaligi/kvartiralar xonalari va hududini yoritish, elektr-maishiy va boshqa priborlardan foydalanish, ovqat tayyorlash, isitish va issiq suv ta'minoti).
- 1.3. Ushbu Shartnoma shartlari turar joydan bir vaqtning oʻzida unda istiqomat qilgan holda tovarlar ishlab chiqarish (ishlar bajarish, xizmatlar koʻrsatish) uchun foydalangan oilaviy korxonalarga nisbatan ham tatbiq etiladi.

II. YETKAZIB BERILGAN ENERGIYANI HISOBGA OLISH

- 2.1. Iste'molchining iste'mol qilinadigan yillik elektr energiyasi hajmi Iste'molchining yillik iste'mol qiladigan elektr energiyasi hajmi kVt*soatni tashkil qiladi.
- 2.2. Iste'molchi tomonidan hisob-kitob davrida amalda iste'mol qilingan elektr energiyasi miqdori Iste'molchining elektr energiyasini hisobga olish pribori ko'rsatkichlari bo'yicha aniqlanadi.
- 2.3. Koʻp qavatli uylardagi kvartiralar ichkarisida, shaxsiy uylarni ichki qurilmalarida, yordamchi xoʻjaliklar, shaxsiy foydalaniladigan tomorqa bogʻ obyektlarida oʻrnatilgan hisobga olish priborini saqlanishi va butunligi uchun javobgarlik Iste'molchiga yuklanadi.

Hisobga olish Iste'molchining aybi bilan buzilgan taqdirda (tok va kuchlanishni oʻlchash transformatorlarining ishdan chiqishi, shuningdek, ikkilamchi kommutatsiya, hisobga olish priborlarining shikastlanishi va ularning yoʻqolishi) hisobga olish nazorat qilish priborlarini va ularga tegishli asbob-uskunalarni almashtirish, ta'mirlash, davlat qiyoslovidan oʻtkazish va oʻrnatish iste'molchi tomonidan ular qiymati va koʻrsatilgan xizmatlar uchun haq toʻlangan holda, Ta'minotchi korxona tomonidan amalga oshiriladi

2.4. Iste'molchidagi elektr energiyasini hisobga olish elektron priborlarini sotib olish, roʻyxatga olish, davriy davlat qiyoslovidan oʻtkazish va plombalash, shuningdek mavjud (jumladan induksion) hisobga olish priborlari Ta'minotchi korxona mablagʻlari hisobidan almashtiriladi. Elektr energiyasini hisobga olish va nazorat qilishning avtomatlashtirilgan tizimi (keyingi oʻrinlarda EHNAT deb ataladi)ni joriy etish loyihasi doirasida nazarda tutilgan iste'molchilarning mazkur tizimga mos kelmaydigan elektr energiyasini hisobga olish priborlarini davriy qiyoslov muddati kelganda, ushbu priborlarni qiyoslovdan oʻtkazmasdan oʻrniga avtomatlashtirilgan tizimga mos keluvchi priborlar oʻrnatiladi.

Iste'molchi tomonidan elektr energiyasi tarmoqlariga o'zboshimchalik bilan ulanish yoki ulardan foydalanish qoidalarini boshqacha tarzda buzish yoxud hisobga olish qurilmalariga, shu jumladan ularning

plombalariga qasddan shikast yetkazish yoki bunday hisobga olish priborlarining koʻrsatkichlarini oʻzgartirish maqsadida ularga tashqaridan aralashishlar oqibatida hisobga olish priborlari ishdan chiqqan hollarda hisobga olish priborlari iste'molchilar hisobidan sotib olinadi va almashtiriladi.

Elektr tarmoqlariga yangidan ulanadigan uy-joylar va xonadonlarda EHNATga ulanadigan elektr energiyasini hisobga olish priborlari ham Ta'minotchi korxona hisobidan sotib olinadi, o'rnatiladi, ro'yxatga olinadi va plombalanadi.

Hisobga olish priborlari oʻrnatilgandan keyin Ta'minotchi korxona tomonidan besh ish kunida "Billing" tizimiga kiritadi.

Elektr tarmoqlariga yangidan ulanadigan uylar va xonadonlarda Iste'molchi tomonidan Ta'minotchi korxona bilan birgalikda elektr energiyasini hisobga olish priborlari oʻrnatiladigan joy va ularni oʻrnatish uchun zarur materiallar oldindan aniqlanadi. Bunda hisobga olish priborini montaj qilish uchun materiallar Iste'molchi tomonidan sotib olinadi.

Iste'molchining (jismoniy shaxsning) elektr energiyasini hisobga olish priborini yechish, qiyoslashdan oʻtkazish va oʻrnatish Vazirlar Mahkamasining 2019-yil 20-avgustdagi 698-sonli qarori bilan Yuridik va jismoniy shaxslarning elektr energiyasini hisobga olish uskunalarini (hisoblagichni) yechish, qiyoslashdan oʻtkazish va oʻrnatish boʻyicha davlat xizmatlari koʻrsatishning ma'muriy reglamenti asosida amalga oshiriladi. Davlat xizmatlari proaktiv shaklda (murojaatsiz) hamda Davlat xizmatlari markazlari yoki Oʻzbekiston Respublikasi Yagona interaktiv davlat xizmatlari portali (keyingi oʻrinlarda YIDXP deb ataladi) orqali koʻrsatiladi.

Shuningdek, energiya resurslarini hisobga olishning avtomatlashtirilgan tizimini joriy etish doirasida elektr energiyasi hisobga olishning zamonaviy priborlarini oʻrnatish Oʻzbekiston Respublikasi Adliya vazirligi tomonidan 2018-yil 4-maydagi 3005-son bilan roʻyxatga olingan Nizom talabiga muvofiq amalga oshiriladi.

2.5. Hisobga olish uskunalarini qiyoslashdan oʻtkazish metrologiya xizmati tomonidan qonunchilikka muvofiq amalga oshiriladi. EHNATni joriy etish loyihasi doirasida oʻrnatilgan hisobga olish priborlari uchun har 10 yilni tashkil etadi.

Hisobga olish priborlariga 2019-yil 1-noyabrga qadar rasmiylashtirilgan qiyoslash sertifikatlarining amal qilish muddati oʻz kuchida qoladi.

Qiyoslash bilan bogʻliq ishlar, hisobga olish pribori yechilgandan soʻng 8 kun ichida tugatilishi kerak.

Iste'molchiga Ta'minotchi korxona tomonidan EHNATga mos keladigan hisoblagichlar oʻrnatilishida (oʻrnatilganda), hisoblagichlarning sifat va sarf koʻrsatkichlari hamda ishlash mexanizmlariga (dasturiy ta'minot, hisoblagichlarning tarkibiy qismlari) iste'molchilar tomonidan shubha tugʻilgan taqdirda, Iste'molchi tomonidan belgilangan tartibda qiyoslovdan oʻtkazilishi va vakolatli organ tomonidan respublika hududida foydalanishga ruxsat etilgan boshqa turdagi hisoblagichlarni nazorat tartibida parallel ravishda Iste'molchi mablagʻlari hisobidan elektr ta'minoti korxonasi tomonidan belgilangan tartibda bepul oʻrnatib beriladi. Bunda boshqa turdagi hisobga olish priborining elektr energiyasini hisobga olishning aniqlik darajasi Ta'minotchi korxona tomonidan oʻrnatilgan hisobga olish pribori bilan bir xil boʻlishi lozim. Hisoblagichlarning koʻrsatkichlarini solishtirish jarayonida tafovutlar aniqlangan taqdirda, Iste'molchi bilan belgilangan tartibda qayta hisob-kitob qilinadi.

- 2.6. Iste'molchining hisobga olish priborini yechish (demontaj qilish), oʻrnatish (montaj qilish) va plombalash Ta'minotchi korxonaning vakolatli xodimlari tomonidan Iste'molchining ishtirokida tegishli dalolatnomani tuzgan holda amalga oshiriladi.
- 2.7. Ta'minotchi korxona vakillari belgilangan namunadagi va tegishli amal qilish muddati qayd etilgan guvohnomani ko'rsatgan taqdirda, soat 8^{00} dan 20^{00} gacha to'sqinliksiz hisobga olish priborini ko'zdan kechirish huquqiga egadir.

III. HISOB-KITOBLAR TARTIBI

3.1. Iste'molchi tomonidan axoli turar joylari, xonadonlar, umumiy yotoqxonalar, yordamchi xoʻjaliklar, shaxsiy foydalaniladigan tomorqa bogʻ obyektlarida, shu jumladan bogʻdorchilik shirkatlari va dala hovlilarni sugʻorishda elektr nasoslari, elektromobilni elektr quvvatlagich, shaxsiy avtomobillar turadigan garajlarda maishiy ehtiyojlari uchun ishlatilgan energiya, qoʻllaniladigan elektr qabul qilgichlarning quvvati va vazifasidan qat'iy nazar, aholi uchun belgilangan yagona bir stavkali tarif boʻyicha hisob-kitob qiladi.

Ovqat tayyorlash uchun markazlashgan holda elektr plitalar bilan jihozlangan koʻp kvartirali uy-joylar va yotoqxonalarda yashaydigan maishiy iste'molchilar tomonidan foydalaniladigan elektr energiyasi haqi ushbu tarif guruhiga kiradigan amaldagi tarifning 50 foizi miqdorida toʻlanadi.

Bunda ovqat tayyorlash uchun markazlashgan holda elektr plitalari bilan jihozlangan koʻp kvartirali uy-joylar va yotoqxonalarda yashaydigan elektr energiyasi iste'molchilari yuqoridagi xatboshida nazarda tutilgan tarif boʻyicha haq toʻlaydi. Ushbu uy va yotoqxonalarni elektr tarmoqlariga ulash boʻyicha texnik shartlarda avval boshidan mazkur elektr plitalarining quvvati hisobga olingan, elektr qurilmalarni (transformatorlar, kuchlanish kabellari, taqsimlash qutilari, kommutatsiya uskunalari, elektr uzatgichlar va boshqalarni) loyihalashtirish va montaj qilish ularning texnik shartlarda koʻrsatilgan quvvat hisobga olingan holda amalga oshiriladi.

- 3.2. Ushbu shartnoma boʻyicha Iste'molchi va Ta'minotchi korxona oʻrtasidagi hisob-kitob davri bir oy hisoblanadi (EHNATga ulangan Iste'molchi bundan mustasno).
- 3.3. Iste'molchi har oyning 10-sanasiga qadar o'tgan oyda iste'mol qilingan energiya uchun to'liq hisob-kitob qilishi shart. Ushbu ko'rsatilgan muddat o'tgandan keyin qarzdorlik mavjud bo'lganda, Iste'molchi belgilangan tartibda elektr tarmoqlaridan majburiy uziladi.
- 3.4. Iste'mol qilingan elektr energiyasi uchun toʻlovlar Iste'molchi tomonidan toʻldirilgan toʻlov hujjatlari boʻyicha amalga oshiriladi. Bunda toʻlovlar qonunchilik bilan belgilangan barcha mavjud usullarda (tijorat banklar va pochta boʻlimlari, elektron toʻlov tizimlari va .k.) amalga oshiriladi.
- 3.5. Iste'molchi toʻlov boʻyicha qarzdor boʻlganda, toʻlov muddati oʻtgan har bir kun uchun toʻlov muddati oʻtgan summaning 0,1 foizi miqdorida, lekin muddati oʻtgan toʻlov summasining 50 foizidan koʻp boʻlmagan miqdorda Ta'minotchi korxonaga penya toʻlaydi.
- 3.6. Iste'molchining kvartirasida, shaxsiy yashash uyida ro'yxatdan o'tgan va voyaga yetgan jismoniy shaxslar iste'mol qilingan energiyasi to'lovi uchun majburiyatlarga Iste'molchi bilan birgalikda javobgardir.

Voyaga yetgan jismoniy shaxsning birgalikda javobgarligi Iste'molchiga qarashli turar joyiga ro'yxatga kiritilishi paytidan ro'yxatdan chiqarilishi davriga qadar hisoblanadi.

3.7. Elektr energiyasi uchun amaldagi tariflar oʻzgargan taqdirda, hududiy elektr tarmoqlari korxonasi ularning kuchga kirishidan oʻn besh kun oldin qarorni ommaviy axborot vositalarida e'lon qiladi.

Bunda elektr energiyasi uchun tariflar oʻzgargan sanadan qat'iy nazar, tarif oʻzgarganda tarif oʻzgargan sanagacha iste'mol qilingan energiya hajmi oldingi toʻlov vaqtidan boshlab oʻrtacha sutkalik iste'mol boʻyicha aniqlanadi va unga eski tarif boʻyicha haq toʻlanadi. Hisobga olish priborining koʻrsatkichlari toʻlov kunida yozib olingan deb hisoblanadi. Tariflar oʻzgargandan keyin iste'mol qilingan elektr energiyasi miqdori uchun yangi tarif boʻyicha haq toʻlanadi.

Arifmetik xatoliklar, tariflarni notoʻgʻri qoʻllash tufayli paydo boʻladigan kam va ortiqcha toʻlovlar tegishli tarif boʻyicha kVt*soatlarda qayta hisoblab chiqiladi va Ta'minotchi korxona tomonidan da'vo muddati doirasida koʻrsatkichlardagi tafovut yoki qoʻshimchalar bilan birgalikda hisobga olinadi.

- 3.8. Iste'molchi o'z xohishiga ko'ra, 2 oydan ko'p bo'lmagan muddat uchun elektr energiyasidan foydalanish haqini oldindan to'lashi mumkin, bu holda tarif o'zgarsa ham qiymat qayta hisob-kitob qilinmaydi.
- 3.9. EHNATga ulangan yoki elektr energiyasi uchun oldindan toʻlash qurilmasiga ega hisobga olish pribori boʻlgan Iste'molchiga elektr energiyasi oldindan toʻlangan haq doirasida yetkazib beriladi.
- 3.10. Elektr energiyasini hisobga olish pribori Iste'molchining aybisiz vaqtinchalik buzilganda, yetkazib berilgan elektr energiyasi uchun hisob-kitob Ta'minotchi korxonaning qarori bo'yicha, hisobga olish buzilishiga qadar bo'lgan oldingi hisob-kitob davridagi yoki hisobga olish tiklangandan keyingi davrdagi o'rtacha sutkalik sarf bo'yicha amalga oshiriladi.

Elektr energiyasining oʻrtacha sutkalik sarfi boʻyicha hisob-kitob qilish davri bir oydan oshmasligi kerak va shu vaqt ichida hisobga olish qayta tiklanishi zarur.

- 3.11. Agar, hisobga olish priborini, obyektiv sabablarga koʻra, koʻrsatilgan muddatda (oʻlchash transformatori, hisobga olish pribori boʻlmaganda, oʻtib boʻlmaydigan yoʻllar va boshqalar tufayli) tiklash imkoniyati boʻlmasa, Iste'molchiga yetkazib berilgan elektr energiyasi uchun hisob-kitob qilish tartibi va hisobga olishni tiklash muddati Tomonlarning oʻzaro kelishuvi bilan belgilanadi.
 - 3.12. Iste'molchini elektr tarmoqlaridan uzish quyidagi hollarda amalga oshiriladi:

hisob-kitoblar oʻz vaqtida amalga oshirilmaganligi oqibatida foydalanilgan elektr energiyasi uchun qarzdorlik mavjud boʻlganda;

Ta'minotchi korxona vakillariga shaxsiy guvohnomalarini ko'rsatgan taqdirda hisobga olish priborlari ko'rsatkichlarini yozib olish uchun ruxsat etilmaganda;

hisobga olish priborlari qasddan buzilganda, koʻrsatkichlarni oʻzgartirish maqsadida ularni ishlashiga toʻsqinlik qiluvchi xatti-harakatlar amalga oshirilganda;

elektr tarmoqlariga noqonuniy ulanish, talon-toroj qilish va EHNATning soz ishlashiga har qanday usulda ta'sir etish holatlari aniqlanganda.

3.13. Amalga oshirilgan elektr energiyasi sarfining qayta hisobi Iste'molchini Vazirlar Mahkamasining 2018-yil 12-yanvardagi 22-sonli qarori bilan tasdiqlangan Elektr energiyasidan foydalanish qoidalari (keyingi oʻrinlarda Qoidalar deb yuritiladi)ni buzganlik uchun qonunchilik hujjatlarida belgilangan javobgarlikdan ozod etmaydi.

3.14. Qayta ulashda Iste'molchidan to'lov paytidagi bazaviy hisoblash miqdorining ikki baravari miqdorida to'lov undiriladi (EHNATga ulangan iste'molchilar bundan mustasno, lekin hisoblagich va EHNAT tizimiga tashqi ta'sir ko'rsatilgan holatlarda joyiga chiqqan holda tarmoqdan ajratilganda hamda dastur tomonidan tarmoqdan ajratish va ulash imkoniyati mavjud bo'lmagan EHNATga ulangan Iste'molchidan ham qayta ulanish uchun to'lov undiriladi).

Iste'molchi elektr qurilmalarini hududiy elektr tarmoqlari korxonasining elektr tarmoqlariga oʻzboshimchalik bilan ulagan taqdirda, elektr qurilmalari elektr tarmogʻidan darhol uzib qoʻyiladi, iste'molchidan esa ruxsatsiz iste'mol qilingan elektr energiyasining qiymati iste'molchi rasmiy ravishda davlat roʻyxatidan oʻtkazilgan kundan boshlab oʻtgan vaqt mobaynida (tasdiqlovchi hujjatlar mavjud boʻlganda) yoki da'vo muddati uchun elektr energiyasini qabul qilgich qurilmaning ulangan quvvat boʻyicha sutkasiga 24 soat davomida ishlashi va oʻzboshimchalik bilan ulangan elektr tarmogʻi (elektr uzatish liniyasi va transformatorlar) uchastkasida yoʻqotilgan quvvat hisobidan undiriladi.

Hisobga olinmagan elektr energiyasi qiymatini undirish uchun elektr energiyasidan foydalanish qoidalari buzilishiga yoʻl qoʻygan iste'molchi yoki uning vakili ishtirokida yoki Iste'molchi ishtirok etishni rad etgan taqdirda uning ishtirokisiz belgilangan tartibda qayta hisob-kitob amalga oshiriladi.

Iste'molchida elektr energiyasini hisobga olish priborini ulash sxemasi oʻzgarganda, priborga zarar yetkazilganda (iste'molchining aybi bilan) yoki plombalari buzilganda, hisobga olish priborining xotira bloki va uni dasturlashdan foydalanish tugmasiga (boʻlmasiga) tashqaridan ta'sir koʻrsatilganda, elektr energiyasini hisobga olish priborlaridan tashqari boshqa elektr qabul qilgichlar ulanganda va amalda iste'mol qilingan elektr energiyasi koʻrsatkichlarini kamaytirish maqsadida boshqa qoida buzilishlarga yoʻl qoʻyilganda, Ta'minotchi korxonaning vakili qoida buzilishi haqida belgilangan namunada dalolatnoma tuzadi.

Dalolatnoma asosida:

Iste'molchining aybi bilan elektr energiyasini hisobga olish pribori, elektr energiyasini oʻlchov transformatorlarini ulash sxemalari oʻzgartirilganda, hisobga olish priborining xotira bloki va uni dasturlashdan foydalanish tugmasiga (boʻlmasiga) tashqaridan ta'sir koʻrsatilganda va hisobga olishni nazorat qilish priborlaridan tashqari elektr qabul qilgichlar koʻz bilan aniqlab boʻlmaydigan yashirin yoʻl bilan (yashirin elektr simlari, pereklyuchatellar montaj qilinishi va shu kabilar) ulanganda — hisobga olishning nazorat asboblari oxirgi almashtirilgan yoki ulanish sxemalari tekshirilgan kundan boshlab, biroq da'vo muddatidan ortiq boʻlmagan muddatga;

elektr energiyasini hisobga olish priboriga Iste'molchining aybi bilan zarar yetkazilganda (plombasi buzilishiga yoʻl qoʻyilgan, oynasi singan va shu kabi holatlar) yoki elektr energiyasi aylanib chiqishda koʻz bilan aniqlash mumkin boʻlgan boshqa usulda oʻgʻirlangan taqdirda — oxirgi marta aylanib chiqilgan yoki oxirgi marta elektron tarzda koʻrsatkichlarni olingan kundan boshlab, biroq da'vo muddatidan ortiq boʻlmagan muddatda amalga oshiriladi.

elektr energiyasini hisobga olish priboriga zarar yetkazilganda (Iste'molchining aybi bilan) yoki pribor mavjud boʻlmaganda, plombalar buzilganva amalda iste'mol qilingan elektr energiyasi koʻrsatkichlarini kamaytirish maqsadida aylanib chiqishda koʻz bilan koʻrib aniqlanadigan boshqa qoida buzishlarga yoʻl qoʻyilgan taqdirda (shu jumladan, elektr energiyasini hisobga olish priboridan boshqa elektr qabul qilishlar ulanganda) — oxirgi aylanib chiqish yoki oxirgi marta elektron tarzda koʻrsatkichlarni olingan kundan boshlab, biroq da'vo muddatidan ortiq boʻlmagan muddatga hisobga olinmagan elektr energiyasi miqdori qiymati hisob-kitob qilinadi.

Qoidalar talabi buzilgan holda foydalanilgan elektr energiyasi qiymatini qayta hisob-kitob qilish ushbu bandning toʻrtinchi — sakkizinchi xatboshilariga muvofiq Iste'molchida shtepsel rozetkalari mavjud boʻlganda (rozetkalar va elektr energiyasi qabul qilgichlar sonidan qat'iy nazar) bir sutkada 24 soat 600 Vt quvvatdan foydalanish hisobidan, 600 Vt dan ortiq quvvatli isitish priborlari yoki boshqa elektr asbob-uskunalari mavjud boʻlganda esa Iste'molchi foydalanayotgan elektr energiyasi qabul qilgichlardan bir sutkada 24 soat foydalanish hisobidan kelib chiqib, ularning amaldagi quvvati boʻyicha amalda yoritish elektr energiyasi qabul qilgichlardan sutkaning yorugʻ boʻlmagan vaqtida foydalanish hisobidan kelib chiqib, yoritish elektr qabul qilgichlarning quvvati boʻyicha amalga oshiriladi.

Hisobga olinmagan elektr energiyasining qayta hisob-kitobi belgilangan tartibda, biroq da'vo muddatidan ortiq boʻlmagan muddatga, Qoidalar talabi buzilishiga yoʻl qoʻygan Iste'molchi yoki uning vakili ishtirokida yoxud ishtirokisiz hududiy elektr tarmoqlari korxonasi tomonidan qoida buzish aniqlanishidan oldingi davr uchun amalda toʻlangan elektr energiyasi miqdori hisobga olingan holda amalga oshiriladi.

Elektr energiyasidan foydalanishda Iste'molchi tomonidan yoʻl qoʻyilgan qoidabuzilishlar Ta'minotchi korxona vakili va Iste'molchi tomonidan imzolangan ikki nusxadagi belgilangan shakl boʻyicha dalolatnoma bilan rasmiylashtiriladi, uning bir nusxasi Iste'molchiga beriladi va Ta'minotchi korxona tomonidan ushbu Qoidalarni buzgan Iste'molchi elektr qurilmalari tarmoqdan uzib qoʻyiladi.

Iste'molchi dalolatnomani imzolashni rad etgan taqdirda, qoida buzish dalolatnomasida iste'molchini tanishtirganlik to'g'risida belgi qo'yiladi.

Dalolatnoma tuzilgandan soʻng Ta'minotchi korxonaning Hay'at a'zolari tomonidan Iste'molchi ishtirokida 10 kunlik muddatda dalolatnomaga asosan Iste'molchi tomonidan amalga oshirilgan qoidabuzarlik boʻyicha tegishli hisob-kitob koʻrib chiqiladi va uning natijasida qoidabuzarlik Iste'molchiga toʻliq asoslantiriladi. Shuningdek, Iste'molchi tomonidan Ta'minotchi korxonaga toʻlashi lozim boʻlgan hisob-kitob batafsil tushuntirilgan holda hisob-kitobning bir nusxasini Iste'molchiga taqdim etishi lozim.

Iste'molchi Ta'minotchi korxona tomonidan qo'yilgan qoidabuzarlikka (ayblovga) va hisob-kitobga norozi bo'lgan taqdirda belgilangan tartibda tegishli idoralarga hamda sudga murojaat qilish huquqiga ega.

3.15. Iste'molchi tomonidan o'z ehtiyojlari uchun kuchlanishi 1000 V dan yuqori elektr tarmoqlari montaj qilingan hollarda:

elektr energiyasini hisobga olish pribori transformator punktining 0,4 kVli taqsimlash qurilmasida oʻrnatiladi:

elektr tarmoqlari Iste'molchining uyga egalik qilish hududidan tashqarida joylashtiriladi.

- 3.16. Iste'molchi 1000 V dan yuqori kuchlanishdagi elektr tarmoqlariga ega bo'lgan holda, Iste'molchiga tegishli bo'lgan 1000 V dan yuqori kuchlanishli elektr tarmoqlaridagi (liniyalar, transformator punkti) elektr energiyaning texnologik yo'qotishlari hisob-kitob yo'li bilan aniqlanadi va uning iste'moliga qo'shiladi hamda bu haqda Shartnomada tegishli yozuv qayd etiladi.
- 3.17. Elektr ta'minoti korxonasining elektr tarmoqlari va uylarning ichki elektr tarmoqlarining bo'linish chegarasidan umumiy mulk hisoblanadigan ushbu tarmoqlardan ta'minlanadigan Iste'molchining elektr energiyasini hisobga olish priborigacha bo'lgan elektr tarmoqlaridagi elektr energiyasi yo'qotishlari Ta'minotchi korxonaning texnologik yo'qotishlarida hisobga olinadi.

IV. TOMONLARNING HUQUQ VA MAJBURIYATLARI

4.1. Iste'molchi quyidagi huquqlarga ega:

oʻz elektr qurilmalarini texnik shartlarga muvofiq Ta'minotchi korxona tarmoqlariga ulash;

sifat koʻrsatkichlari amaldagi davlat standartlariga (GOST 32144-2013 va GOST 13109-97) muvofiq elektr energiyasi olish;

Hisobga olish priborlari ishlashida muammolar kelib chiqqanda (qizil (muammo) indiktori yonganda, klemmalari yaxshi qotilmaganda va boshqalarda) unga tegishmagan holda unda yuzaga kelgan muammolarni bartaraf etish boʻyicha Ta'minotchi korxonaga murojaat etish;

elektr energiyasi yetkazib berishni tugatilishi yoki toʻxtatib qoʻyish sabablari toʻgʻrisida belgilangan tartibda axborot olish;

elektr energiyasi toʻliq hajmda yetkazib berilmasligi yoki sifat koʻrsatkichlari amaldagi davlat standartlariga muvofiq boʻlmagan elektr energiyasi yetkazib berilishi oqibatida Ta'minotchi korxona yoki uning elektr ta'minoti korxonasi tomonidan yetkazilgan zararlarni belgilangan tartibda (yoki ushbu shartnomaning 6.2-bandiga muvofiq holda) qoplanishini talab qilish;

shartnoma bekor qilinganda foydalanilmagan elektr energiyasi miqdori uchun toʻlangan summani qaytarishni talab qilish;

gonun hujjatlariga muvofiq bir taraflama shartnomani bekor qilish;

shartnomani tuzish va bajarishda yuzaga kelayotgan nizolarni hal etish uchun sudga, monopoliyaga qarshi organiga yoki boʻysunuvi boʻyicha yuqori organ (mansabdor shaxs) ga murojaat qilish;

elektr energiyasi yetkazib berilishi asossiz (sababsiz) toʻxtatilganda yetkazilgan zararni qoplashni talab qilish;

Iste'molchi telefon raqami o'zgarganda, bu haqida ta'minotchi korxonaga xabar berish;

Iste'molchi qonun hujjatlariga muvofiq boshqa huquqlarga ham ega bo'lishi mumkin.

Iste'molchining shartnomada belgilanganidan boshqa huquqlari

4.2. Iste'molchi quyidagilarga majbur:

Ta'minotchi korxona tomonidan belgilangan elektr energiyasini iste'mol qilish rejimiga rioya etish; foydalanilgan elektr energiyasi (quvvati) uchun o'z vaqtida haq to'lash;

ishlatilayotgan elektr qurilmalari, priborlar va asbob-uskunalarning zarur texnik holatini va elektr qurilmalarini ishlatishda xavfsizlik texnikasi qoidalariga rioya qilinishini ta'minlash, elektr ta'minoti korxonasiga elektr asbob-uskunalarining nosozligi toʻgʻrisida xabar qilish;

telefon raqamlari oʻzgargan taqdirda bu haqida Ta'minotchi korxonani xabardor qilish;

elektr energiyasidan oqilona foydalanish chora-tadbirlarini amalga oshirish;

oʻrnatilgan tartibda Ta'minotchi korxona vakiliga elektr energiyasini hisobga olish priborlarini koʻrishiga imkon berish.

Iste'molchining shartnomada belgilanganidan boshqa majburiyatlari

4.3. Ta'minotchi korxona quyidagi huquqlarga ega:

Iste'molchidan mazkur Shartnomada koʻrsatilgan majburiyatlarni lozim darajada bajarishni talab qilish;

iste'molchilar tomonidan elektr ta'minoti shartnomasi shartlari bajarilmasligi yoki buzilishi oqibatida unga yetkazilgan zararning belgilangan tartibda qoplanishi;

avariya rejimida, Iste'molchini elektr tarmog'idan uzib qo'yish;

EHNATga ulangan va oldindan toʻlangan mablagʻ tugagandan soʻng elektr energiyasi uchun oldindan toʻlovni amalga oshirish qurilmasiga ega hisobga olish pribori mavjud boʻlgan iste'molchilarni uzish;

Ta'minotchi korxona qonun hujjatlariga muvofiq boshqa huquqlarga ham ega bo'lishi mumkin.

Ta'minotchi korxona amaldagi normativ-huquqiy hujjatlarda nazarda tutilgan holatlarda iste'molchilarni elektr tarmoqlaridan uzish oqibatlari uchun javobgar bo'lmaydilar.

Ta'minotchining shartnomada belgilanganidan boshqa huquqlari

4.4. Ta'minotchi korxona quyidagilarga majbur:

elektr energiyasini elektr tarmoqlarining balans boʻyicha mansublik boʻlinish chegarasiga ushbu Shartnomada koʻrsatilgan hajmda uzluksiz yetkazib berish;

uskunalarni, elektr uzatish liniyalarini, elektr energiyasini hisobga olish priborlarini ekspluatatsiya qilish, ularga xizmat koʻrsatish va uskunalarni ta'mirlash, shuningdek oʻz elektr tarmogʻi xoʻjaligi obyektlarida nosozliklarni bartaraf etish;

Iste'molchi hisobga olish priborlari ishlashida muammolar yuzasidan xabar bergan holda shu kuni mazkur masalani joyiga chiqqan holda o'rganib, belgilangan tartibda bartaraf etish chorlarini ko'rish;

oʻz elektr tarmogʻi xoʻjaligi obyektlarida elektr energiyasi sifat koʻrsatkichlarini amaldagi davlat standartlarida (GOST 32144-2013 va GOST 13109-97) belgilangan darajada saqlab turish;

elektr tarmogʻi xoʻjaligi obyektlarining rejali ta'mirlanishi tufayli elektr energiyasi bilan ta'minlashdagi mumkin boʻlgan uzilishlar toʻgʻrisida kamida 3 sutka oldin ogohlantirish;

Iste'molchiga elektr energiyasi yetkazib berishning to'xtatib turilishi va buning sabablari to'g'risida ma'lumot berish;

joriy etiladigan cheklashlar haqida, cheklashning hajmi va vaqtini koʻrsatgan holda, oʻz vaqtida xabar qilish;

Iste'molchining elektr energiyasi toʻliq yetkazib berilmaganligi yoki elektr ta'minotida boshqa qoida buzilishlar toʻgʻrisidagi arizalarini, iste'molchidan ariza olingan kundan boshlab 10 kundan kechikmay koʻrib chiqish, ushbu qoida buzilishlarini bartaraf etish va Iste'molchiga Qoidalarga muvofiq batafsil javob yuborish;

Iste'molchining hisobga olish priborini o'z vaqtida qiyoslovdan o'tkazishni tashkil etish;

Iste'molchining sarflagan elektr energiyasi uchun qarzi vujudga kelganda qarzni besh kun muddatda to'lash zarurligi to'g'risida yozma xabardor qilish (EHNATga ulangan iste'molchilar bundan mustasno);

Iste'molchining elektr tarmoqlari va qurilmalarini oʻz hududiy elektr tarmoqlariga ulash yuzasidan texnik shartlar berish;

Iste'molchiga yetkazib berilgan elektr energiyasini belgilangan tartibda hisobga olib borish;

Iste'molchiga o'rnatilgan elektr energiyasi iste'molini hisobga olish priborini almashtirish, o'rnatish va xizmat ko'rsatishni ta'minlash, shuningdek ularni plombalash;

telefon raqamlari oʻzgarganda, bu haqida Iste'molchilarga xabar berish.

Ta'minotchi korxona qonun hujjatlariga muvofiq boshqa majburiyatlarga ham ega bo'lishi mumkin.

Ta'minotchining shartnomada belgilanganidan boshqa majburiyatlari

V. Elektr energiyasini cheklash yoki uzib qoʻyish shartlari

- 5.1. Hududiy elektr tarmoqlari korxonalariga elektr tarmogʻi xoʻjaligi obyektlaridagi avariyalarning oldini olish va bartaraf etish yoki odamlar xavfsizligini ta'minlash ishlari bilan bogʻliq kechiktirib boʻlmaydigan chora-tadbirlarni amalga oshirish zarur boʻlganda, iste'molchi bilan kelishmasdan va uni ogohlantirmasdan, biroq uni darhol xabardor qilgan holda elektr energiyasini uzatishni uzib qoʻyish yoki cheklashga ruxsat etiladi.
- 5.2. Elektr energiyasi iste'molini cheklash, shuningdek, iste'molchilar yuklamalari jadvallarini tartibga solish chora-tadbirlari, cheklashlar jadvaliga muvofiq "Hududiy elektr tarmoqlari" AJ tomonidan tasdiqlangan tartibda amalga oshiriladi.

Quvvat va elektr energiyasi iste'moli bo'yicha cheklash va uzib qo'yish jadvallari hududiy elektr tarmoqlari korxonasi tomonidan mahalliy davlat hokimiyati idoralari bilan kelishiladi, "Hududiy elektr tarmoqlari" AJ tomonidan tasdiqlanadi va yagona elektr energetika tizimida elektr quvvati va energiya

tanqisligi paydo boʻlganda joriy etiladi. Iste'molchilar bilan elektr energiyasi quvvati va iste'mol qilish boʻyicha cheklash va uzib qoʻyish jadvallari alohida tuzilmaydi.

5.3. Qoidalarda nazarda tutilmagan sabablarga koʻra Iste'molchini elektr energiyasidan oʻchirganlik, shuningdek cheklashlar jadvalini "Hududiy elektr tarmoqlari" AJ tomonidan tasdiqlanmagan holda amalga kiritilgan taqdirda hududiy elektr tarmoqlari korxonalariga nisbatan qonunchilik hujjatlariga muvofiq iqtisodiy choralar qoʻllaniladi.

VI. TOMONLARNING JAVOBGARLIGI

- 6.1. Ushbu Shartnoma boʻyicha majburiyatlarini bajarmagan yoki tegishli darajada bajarmagan Ta'minotchi korxona buning oqibatida yetkazilgan zararni, Iste'molchi esa haqiqiy zararni qoplashga majbur.
- 6.2. Elektr energiyasining sifat koʻrsatkichi: chastotasi 50 Gs, nominal kuchlanishi 220 V (380 V, 6 kV, 10 kV), nominal kuchlanishning ruxsat etilgan oʻzgarishi ±10 foizni tashkil etadi (GOST 32144-2013 va GOST 13109-97). Elektr energiyasini sifat koʻrsatkichlari buzilganda (ruxsat etilgan kuchlanishning oʻzgarish foizidan kamayib va koʻtarilib ketgan taqdirda) uni aniqlash Ta'minotchi korxona va Iste'mochi, "Oʻzenergoinspeksiya", xususiy uy-joy mulkdorlari shirkati yoki mahalla fuqarolar yigʻini vakillari, akkreditatsiyadan oʻtgan standart organi bilan birgalikda maxsus akkreditatsiyadan oʻtkazilgan elektr energiyasini oʻlchov uskunalari orqali oʻlchov ishlari olib borish natijasida aniqlanadi va belgilangan tartibda dalolatnoma tuziladi, dalolatnomaga Iste'molchining buzilgan elektr qurilmalari roʻyxati qayd etiladi, imzolanadi hamda tomonlarga bir nusxadan beriladi. Ushbu oʻlchov davri 3 kun davomida amalga oshiriladi. Bunda barcha harajatlar aybdor tomon mablagʻlari hisobidan sud tartibda qoplanadi.
- 6.3. Tomonlar ularning xohish va harakatlariga bogʻliq boʻlmagan tabiiy ofatlar yoki ijtimoiy-iqtisodiy vaziyatlar sababli ushbu sharoitlarda qaytarib boʻlmaydigan va oldindan bilib boʻlmaydigan favqulodda holatlarni oʻz ichiga olgan yengib boʻlmas kuch (fors-major) oqibatida oʻz zimmasiga olingan majburiyatlarni bajara olmasa, tomonlardan hech biri oʻz majburiyatlarini toʻliq yoki qisman bajarmagani uchun javob bermaydi.
- 6.4. Ushbu Shartnomani bajarish jarayonida yuzaga kelayotgan barcha kelishmovchilik va nizolar muzokara oʻtkazish orqali hal qilinadi. Kelishmovchiliklarning muzokara oʻtkazish orqali hal qilinishi iloji boʻlmaganda qonunchilik hujjatlari talablariga muvofiq nizolarni hal etish uchun sudga yoki boʻysunishi boʻyicha yuqori tashkilotga, mansabdor shaxsga murojaat qilish huquqiga ega.

VII. KORRUPSIYAGA QARSHI TALABLAR

- 7.1. Shartnomaning har bir tomoni oʻziga nisbatan qoʻllaniladigan barcha, shu jumladan Oʻzbekiston Respublikasi amaldagi qonunchilik va normativ-huquqiy hujjatlardagi Korrupsiyaga qarshi tegishli shartlar va talablarni tushunishi haqida bir-birini ishontiradi va ularga amal qilishini kafolatlaydi.
- 7.2. Iste'molchi ushbu shartnoma amalda bo'lgan butun davr mobaynida u (shuningdek uning mansabdor shaxslari, direktori, xodimlari, agentlari va boshqa vakillari) Ta'minotchi korxonaning manfaatlarida uning agenti yoki vakili sifatida harakat qilib, Ta'minotchi korxonaning hamda O'zbekiston Respublikasi amaldagi qonunchilik va normativ hujjatlarining Korrupsiyaga qarshi tegishli shartlari va talablariga qat'iy rioya etish majburiyatini oladi.

VIII. YAKUNLOVCHI SHARTLAR

8.1.Mazkur shartnomani tomonlar imzolagan kundan boshlab Shartnomaning amal qilish muddati gacha boʻlgan muddatga tuzildi.

Shartnomaning amal qilish muddati tugaganda, tomonlardan biri uni uzaytirish yoki bekor qilish boʻyicha ariza bermagan boʻlsa, shartnoma keyingi har bir yilga uzaytirilgan hisoblanadi. Ariza ushbu Shartnomaning amal qilish muddati tugashidan bir oy oldin taqdim etilishi lozim.

- 8.2. Shartnoma 11 betdan iborat boʻlib, har ikki tomon uchun teng yuridik kuchga ega boʻlgan ikki nusxada tuzilgan.
- 8.3. Iste'molchi bilan boshqa iste'molchilar (ijarachilar) oʻrtasida, tadbirkorlik subyektlari oʻrtasida turli xil nizo (kelishmovchilik) yuzaga kelgan holatlarda, faqatgina sudning qonuniy kuchga kirgan tegishli

qarorlariga hamda qonunchilik talablariga asosan Ta'minotchi korxona Iste'molchining elektr tarmogʻidan ajratish yoki tarmoqqa qayta ulashni amalga oshiradi.

8.4. Ushbu shartnoma talablarida nazarda tutilgan va tutilmagan holatlar boʻyicha nizolar kelib chiqqan taqdirda amaldagi qonunchilik hujjatlari talablariga muvofiq koʻrib chiqiladi (tartibga solinadi).

Iste'molchiga ogohlantirish!

Umumiy foydalanishdagi elektr tarmoqlariga oʻzboshimchalik bilan ulanish yoki ulardan foydalanish qoidalarini boshqacha tarzda buzish yoxud elektr energiyasini hisobga olish priborlariga shu jumladan ularning plombalariga qasddan shikast yetkazish yoki bunday hisobga olish priborlarining koʻrsatkichlarini oʻzgartirish maqsadida ularga tashqaridan aralashish, Oʻzbekiston Respublikasining Ma'muriy javobgarlik toʻgʻrisidagi kodeksining 101-moddasi hamda Jinoyat kodeksining 185²-moddalariga asosan javobgarlikka tortilishiga sabab boʻladi.

Hisobga olish priborlari haqida ma'lumot

Iste'molchining elektr qurilmalari Elektr qurilmasi ulangan tranformator joylashgan koʻcha koʻchadagi Transformator raqami-son transformator punktidan chiquvchi 0,4 kV Elektr qurilmasi ulangan fider raqami fiderning Elektr qurilmasi ulangan fider tayanchining soni-son tayanchiga ulangan. Hisobga olish priborining turi va raqami Hisobga olish priborining turi va raqami, Oʻzbekiston texnik jihatdan tartibga solish agentligi plombasining raqami: Texnik jihatdan tartibga soluvchining qoʻygan plombasi raqami, Hisobga olish pribori klemmnik qopqogʻidagi Ta'minotchi korxona plombasining raqami: Hisobga olish pribori klemmnik qopqogʻidagi Ta'minotchi korxona plombasining raqami, Shartnoma tuzish paytidagi hisobga olish priborining koʻrsatkichi, Oxirgi qiyoslash sanasi Oxirgi qiyoslash sanasi, navbatdagi qiyoslash sanasi Navbatdagi qiyoslash sanasi, Ulangan quvvat kV kVt.

Ta'minotchi:	Iste'molchi:
Manzil: Ta'minotchining nomi, pochta va manzili	Manzil: Iste'molchining yashash manzili
H/R: Ta'minotchining hisob raqami	Iste'molchining tug'ilgan sanasi yilda tug'ilgan
STIR: Ta'minotchining STIR raqami	Pasport seriya: Iste'molchining pasport seriyasi va raqam
IFUT: Ta'minotchining IFUT raqami	Iste'molchiga pasport bergan IIB nomi tomonidan
Bank kodi (FPM) Ta'minotchining bank kodi raqami	Iste'molchiga pasport berilgan sana yilda berilgan
Telefon: Ta'minotchining aloqa raqamlari	Telefon: Iste'molchining aloqa raqamlari
Dispetcher: Ta'minotchining dispetcher aloqa raqami	Kadastr raqami: Iste'molchining kadastr raqami
Elektron manzil: Ta'minotchining elektron manzili	Mahalla nomi: Iste'molchining mahallasi nomi
Ta'minotchi tashkilot rahbarining F.I.O.si Imzo:	_ Iste'molchining F.I.O.si Imzo:
M.Oʻ:	M.Oʻ:
Ta'minotchi korxona vakili Iste'i	molchi: